

欽  
定  
全  
唐  
文

欽定全唐文卷二百六十目錄

張冽

對嗣足不良判

康廷芝

對求鄰壁光判

對京令問喘牛判

對縣令有惠化判

對縣令辭疾判

對競渡賭錢判

周矩

諫制獄酷刑疏

鄭思齊

駁司刑劉志素定邱神鼎罪判

楊齊哲

諫幸西京疏

張元琮

衛州共城縣百門陂碑序

辛怡諫

衛州共城縣百門陂碑銘

劉志素

按邱神鼎奏

駁徐有功論邱神鼎罪議

再駁徐有功論邱神鼎罪議

魏歸仁

宴居賦

并序

邱愔

陳李昭德罪狀疏

李承嗣

造像記

李師旦

對京令問喘牛判

康瓘

對嗣足不良判

吳師道

對賢良方正策第一道

第二道

第三道

第四道

第五道

司馬鎧

對紫芝白兔判

郝連梵

對刑獄用捨策

張不耀

請代父死表

欽定全唐文卷二百六十

張洎

洎武后朝官侍御史歷倉部郎中

對嗣足不良判

景食一縣嗣子足不良請立其弟禮司不許云

古有其道

藉慶食邑象賢繼踵承家之道將不愧於前修疇嗣之宜庶遙符於古義眷言長嫡疾乃天然既類郤克之刑將同孟紱之廢且仲子立衍循魯禮而知歸韋家封成鏡班書

而有序瞻惟乙請未爽通規在律雖違行權則可請停司  
禁無拒乙辭

康廷芝

廷芝武后朝官河陰令遷戶部員外郎

對求隣壁光判

郝珍性好讀書家貧隣家富乃穿隣壁取燭光

隣告爲盜

郝珍荷衣橫帶緝柳編蒲有賤贏金將希片玉南都自富  
北郭實貧殊謝梁鴻不求因熱乃如蘇季願借餘光已接



武於匡衡方齊蹤於甯越室勿非遽未窺夫子之牆紡績  
可兼輒鑿隣人之壁情非竊伏事涉穿窬抑有前聞宜徵  
故實請從按記不合論辜

對京令問喘牛判

京縣宰冬日退朝逢相害者至死初不屑懷委  
而不問俄見行牛喘停車尋詰久而方去所司  
以爲不理所職妄干他事

皇都赤縣帝宅仙居萬國攸歸四方是則縣令幸陶昌化  
謬宰神京過北陸之寒初屬南宮之朝退珂迴九陌騎厯

三條俄逢薏芥之兇復屬闌單之變材非玉鉉顧牛喘而  
多懷任綰銅章覩人亡而不問旣昧爲邦之術徒興體國  
之心是曰曠官足成侵職所司糾劾有合通途

對縣令有惠化判

晉陵縣人王茂於訪察使所稱縣令任志有惠  
化終日清談職務修理每行笞罰惟以蒲鞭舉  
請升進使司以爲寬疎不依令式欲科縣令不  
伏

任志慶偶千齡榮登萬室彈弦作宰動宓賤之芳聲製錦

無傷追尹何之美政浹辰行化方類子平終日清談更同  
夷甫有恥且格寧收櫝楚之威以德代刑但示蒲鞭之罰  
王茂幸編名數預奉弦歌欣承赤子之恩喜沐慈君之惠  
屬以皇明遠散天使遐巡思甄三異之能式舉一同之善  
訪察使官膺珥筆任總方書飲驄馬於江城集霜烏於海  
樹埋輪糾忒豈謝張綱攬轡澄清何慙孟博眷言褒貶當  
適古今儻昧激揚遂乖彰瘴徵劉寬之故事仁迹斯存覽  
任志之清猷嘉聲可挹旣稱良吏雅合名聞忽見吹毛便  
虧直指銅章有術久垂桃李之陰鐵柱無謀且寢梧桐之

問

對縣令辭疾判

鄭胄授山陰令赴任行至浙江遇風濤鼓怒弭棹而迴乃辭疾解職人告詐病

鄭胄家承曳履職綰鳴弦將登會玉之山欲屈沈錢之浦方冀騁牛刀於劍冶舞鸞磬於鍾巖不孤王阜之能方繼子游之躅泊乎行窮楚塞路入吳江遙山將遠樹不分極岸與長天共合歸濤活活全疑白鷺之飛去舸遥遥直似青鳬之逝覩茲艱險慮有漂沈方懷魚腹之憂豈顧龜腸

之斃情來歛轡既有慕於王陽興盡迴舟亦何思於戴道  
行背浙流之右坐歸漳水之濱從此挂冠頗諧高節因茲  
弭棹未犯彝章輒被告言殊驚物聽任其罷退良謂合宜  
對競渡賭錢判

揚州申江都縣人以五月五日於江津競渡并  
設管絃時有縣人王文身居父服來預管絃并  
將錢物賭競渡因爭先後遂折舟人臂

月觀遙臨旁分震澤雷陂迴瞰近屆邗溝郊連五達之莊  
地近一都之會人多輕剽俗尚驕奢序屬良辰躔係令節

江干可望俱遊白馬之濤邑屋相趨并載飛龍之舳泛長  
波而急槳有類乘毛涌修浪而鳴舷更同浮葉簫吟柳吹  
疑傳塞北之聲棹引蓮歌即唱江南之曲王文閭賤品  
蓬華庸流名教非閑喪儀多闕三年巨痛無聞毀瘠之哀  
五月佳遊且預歌絃之樂重以情存勝負志在雄豪爭馳  
赤馬之津競賭青蚨之貫先後由其不等忿爭於是遂興  
無思李老之言俄折羊公之臂然則居喪聽樂已紊科條  
在服傷人一何凶險論情撫事深穢皇猷定罪明刑理資

丹筆

周矩

矩武后朝官侍御史

諫制獄酷刑疏

頃者小人告訐習以爲常內外諸司人懷苟免姑息臺吏承接強梁非故欲其然規避誣搆耳又推劾之吏皆以深劾爲功鑿空爭能相矜以虐泥耳籠頭枷研楔轂摺脅籤爪懸髮薰鼻臥鄰矢溺曾不聊生號爲制獄將或累日節食連宵緩問晝夜搖撼使不得眠號曰宿囚此等旣非木石且救目前苟求賒死臣竊聽輿議皆稱天下太平何苦

要反豈被告者盡是英雄以求帝王耶只是不堪楚毒自  
誣耳何以覈之陛下試取所告狀酌其虛實者付令推之  
微訊動以探其情所推者必上下其手希聖旨也願陛下  
察之今滿朝側息不安皆以爲陛下朝與之密夕與之讐  
不可保也聞有追攝與妻子即爲死決故爲國者以仁爲  
宗以刑爲助周用仁而昌秦用刑而亡此之謂也願陛下  
緩刑用仁天下幸甚

鄭思齊

思齊武后朝官刑部員外郎



駁司刑劉志素定邱神鼎罪判

凡斷刑名須得指實朦朧作狀斟酌結刑司刑比申過爲非理欲令集議須審議由狀未指歸遣議何事仰尋所推之案取堪憑據之由

楊齊哲

齊哲長安四年官洛陽縣尉

諫幸西京疏

臣聞古先哲后咸以爲獨智不可以任已專欲不可以違衆所以樹板徵謗懸鼓納諫思聞過而從善全直言而沃

心用能綱紀天下統成大業經曰無爲而治者其舜也與  
夫何爲哉安人之道貴於省事陛下以大足元年冬廼睠  
咸京長安三年冬還洛邑四年又將西幸聖躬得無窮於  
車輦乎士卒得無弊於暴露乎扈從僚屬倣裝而不濟隨  
駕商旅栖泊而匪寧東周之人咸懷嗟怨昔者周穆王欲  
周行天下使皆有車轍馬跡祭公謀父作祈招之詩以止  
王心陛下玉琯四周金輿三駕車轍馬跡雖未出於兩都  
巡狩省方事不師於五載雷動天轉海運山移儼彼六龍  
歲適千里此亦近於形人之力矣安人之道臣用有疑此

邦父老抗表留駕陛下告以吐蕃和親爲詞臣愚以爲未  
得也況吐蕃最醜西隅咫尺自京到洛曾不崇朝陛下乃  
欲務其艱遠惠然從之夫千鈞之弩尚不爲鼯鼠發機況  
萬乘之君輕爲邊戎枉駕夫人至賤而不可簡至愚而不  
可欺經曰可畏非人是人不可欺也今陛下此言是欺下  
也使國史何以書之臣朽才淺學竊爲陛下籌之陛下今  
幸長安也乃是背逸就勞破益爲損何者神都帑藏儲粟  
積年充實淮海漕運日夕流行地當六合之中人悅四方  
之會陛下居之國無橫費長安府庫及倉庶事空缺皆藉

洛京轉輸價值非率戶徵科其物盡官庫酬給公私靡耗  
蓋亦滋多陛下居之是國有橫費人疲重徭由此言之陛  
下之居長安也山東之財力日匱在洛邑也關西百姓賦  
役靡加背逸就勞破益爲損殷鑒不遠惟念之文王敬授  
民時所重惟穀今陛下鑾輅以明年正月即塗歲首是就  
耕之初駕行非務農之意無乃不可乎

張元琮

元琮武后時人

衛州共城縣百門陂碑序

昔者結而爲山嶽融而爲江海炎上作苦實表陽九之德  
潤下作鹹克明陰八之數上泄雨露純陽流沛之道也下  
疏川瀆凝陰潤物之理也是以雨露爲長物之本川瀆爲  
潤物之宗故稱之以靈長亦賴之以通濟則知水之爲德  
其大矣哉百門陂案水經出自汲郡共山下泉流百道故  
謂百門會同於淇合流於海魚鹽產利不可談悉爾乃  
字溫夏漁飛濡漱沫負君嚴以作固涵細溜而成廣酌而  
不竭挹之彌沖帶蘇門以霧杳望太行而煙接借如楚國  
雲夢廬峯太湖樊邱之隈小溪抱寒而永注東海之外大

壑凜流而靡極亦有崐嶺四水陽山二泉敘浦見美於郢  
歌蓬池久通於汴邑斯並昭著方冊備經縣世分派雖衆  
爲利不宏豈與夫導源迅激積潤潛涌比魏代之龍號同  
漢官之鴈名或以熨升標奇或以元武爲稱仙公臥隱聞  
諸抱朴之篇叔度凝清出在林宗之論洎夫洗累蕩穢揚  
清激濁所以顯乎義也浴及羣生凴流萬祀所以昭乎仁  
也弱而難勝即其勇也變盈流謙即其智也以此四德以  
利萬人悠悠旣湊滔滔不息加以背險絕面形勝奔流暴  
灑層波疊躍或浹日以收漱忽因風以作濤其利也則商

摧畎澮吐納疆場蓄爲屯雲泄爲行雨沐時稼以俱就喜  
年穀之屢登其清也則湛若狐斯淨猶蟾魄可以洽洗耳  
之樂興濯纓之歌皎鏡不限於冬春洞澈無隔於深淺其  
險也則仰眄崇岫俯臨遐潭潤壑窈窕而助

闕一字

葛蘿

闕一字

字沈以增峻其神也則不行而至不疾而速惟慌惟忽若

有若無禎應克著休祥閒發無幽不顯有感必通祠堂滿  
陰靈石周險每至元律旣謝韶陽肇開紫鶯嬌春紅萼笑  
日申祈者倏來忽往奠祭者煙交霧集綺羅縟野遠增芳  
歲之色泉瀨吟吹閣合雲龕之音樂哉盛哉抑亦曠古之

異迹也縣令曹府君諱懷節伋宇峻邈德聲昭宣軒軒霞  
容湛湛海量夙明撫字之要載綰弦歌之秩虞君蒞俗已  
徂三科滕令移風時兼六縣可謂愷悌君子人之父母者  
也丞齊顓德量冲遠器業通明抱信以居忠養真以凝粹  
光八顧之清範韜七州之敏學主簿程列剛毅有斷撝謙  
自牧尉王表霜雪其操芝蘭其芳尉霍南金不受私謁閑  
於公政頃以西郊失候南畝思澤未浹滂沱之潤尚勞雲  
漢之謠曹君恤人疾苦傷時稼穡躬率僚伍親祠廟壇叩  
頭流涕拜手啟祝曰懷節濫司銅墨時屬炎陽思與幽冥



實佇靈祐若商羊起舞報以牲牢如川鷁不飛覆其勢撩  
於是樽俎具迺弦歌三請下湘君於鱗屋水馬吹泉期太  
一於蛟館雲魚噴浪俄而景貺昭發飛甘驟零實符三關  
字之請頗叶一旬之驗或時獨雲鬱起密雨晦飛又以啟

晴應時獲霽豈不以至誠允切神道遙徵故得歲阜人和  
風行草偃休詠盈於道路美聲逸於都鄙雖復江陵滅焰  
緱氏祈日何以加也其廟有二古碑篆隸磨滅不可復覩  
鄉望前泗州徐城縣尉樂處機獲嘉公賈粗光古錄事隗  
允張明張福等或舄弈簪屨或優游耕鑿擊壤食太平之

粟長歌悅文明之代僉以爲百門之利千載無易增修舊  
烈不亦可乎猶恐歲光忽變靈跡無紀式刊翠炎將表鴻  
休

辛怡諫

怡諫隴西人官殿中侍御史內供奉

衛州共城縣百門陂碑銘

陰

闕一  
字

潤下德稱靈長既成物而宏濟

闕一  
字

發源乎濫觴

涵仁不測垂利無疆廣矣浩浩凜焉湯湯鄘衛之野共山  
之下爰出靈泉洗霧游煙禎應昭顯祠堂巋然神樂泠吹

珍羞迺筵分派逾廣飛湍靡極吐納隄防周流稼穡序悲  
炎亢時乖播植幾勞雲漢之篇徒望湘濱之翼曹君爲政  
樂不可支敬羞蘋藻式薦靈祇景貺潛發浮甘遠洎允符  
東哲之請豈謝關一琨之異蕤賓在月穀雨盈旬酌彼行  
潦薦於神明稽首請止獲霽於辰天長地久歲不留刊石  
紀銘表禎休關四凌千秋

劉志素

志素武后時官司刑司直

按邱神鼎奏

金史卷一百一十一 二  
按邱鼎身居文職黑襖子即是武夫之衣若不夙懷叛心  
擬投豫州無故不合輒造又燒却反狀分明請付法者

駁徐有功論邱神鼎罪議

邱鼎反逆夙蘊包藏非祇一塗豈唯今日虺貞荆河作逆  
之歲於時秩滿神泉准其家在西京旋即合歸本舍爲與  
虺貞相應紆道水下嘉州更至荆襄路過淹留遂經一歲  
當聞荆州河起逆星夜即向唐州荆河界首於懸泉館遂  
共男駿俱作黑褐襖子擬充戰服即明事相應接及聞貞  
敗星夜走來神都即將襖子布施天宮寺明知元來所造

緣反合殺況又聖澤哀矜重令來中丞推覆追奴問鼎勘案逾明論其本愆辜當萬死徐丞內縱姦慝外詐平反奉勅令推反人得實寧敢隱默者

再駁徐有功論邱神鼎罪議

邱鼎謀反與虺族同謀包藏日深又共逆黨連結有功舞文巧法黨逆不忠批退欲縱反人每有唯希僥倖不尋案狀孟浪即批即不據科條法外豈得依允請據志素所批之狀與有功意故縱逆人之平即請申秋官及臺集衆官議

魏歸仁

歸仁武后時人

宴居賦

并序

張校書作虛室賦以示予文旨清峻元義深遠予味之有感聊爲宴居賦以和之其詞曰

氣序忽諸日月其除夏盡炎歇秋至涼初地僻而人物自少庭閑乃室宇成虛寂爾無悟蕭然宴居覽聖賢於上古窺得失於前書或智之不足或愚而有餘諒千變而萬化尤難得而備疏若夫名因行立身由才致官要則謗議斯

起譽高必讒毀自至所以君子逃名達人避位養性以安其體搞文以見其志且貴不如賤善亦同惡貴則但益憂勞善乃未離貪著徒憐顛覆之禍虛纏愛欲之縛前事旣忘後車焉託倘來未足有慰或去可以無忤固當絕於可否齊其適莫聞寵詎驚其心居陋寧改其樂蓋老氏稱德所貴先慈孔門之道一以貫之於常則有允出厥茲屈伸委運行用隨時旣無去無取亦何慮何思

邱愔

惜武后時人

陳李昭德罪狀疏

臣聞百王之失皆由權歸於下宰臣持政常以勢盛爲殃  
魏冉誅庶族以安秦非不忠也弱諸侯以強國亦有功也  
然以出入自專擊斷無忌威震人主不聞有王張祿一進  
深言卒用憂死向使昭王不即覺悟魏冉果以專權則秦  
之霸業或不傳其子孫陛下創業興王撥亂英主總權收  
柄司契握圖天授已前萬機獨斷發命皆中舉事無遺公  
卿百寮具職而已自長壽已來厭怠細政委任昭德使掌  
機權然其幹濟小才不堪軍國大用直以性好凌轢氣負



剛強盲聾下人芻狗同列刻薄慶賞矯枉憲章國家所賴  
者微所妨者大天下杜口莫敢一言聲威翕赫日已熾盛  
臣近於南臺見勅曰諸處奏事陛下已依昭德請不依陛  
下便不依如此改張不可勝數昭德參奉機密獻可替否  
事有便利不預諮謀要待畫旨將行方始別生駁異揚露  
專擅顯示於人歸美引慙義不如此州縣列位臺寺庶官  
入謁出辭望塵懼氣一切奏讞與奪事宜皆承旨意附會  
上言今有秩之吏多爲昭德之人陛下勿謂昭德小心是  
我手臂臣觀其膽乃大於身鼻息所衝上拂雲漢近者新

陷來張兩族兼挫侯王二仇鋒銳更不可當方寸良難窺  
測書曰知人亦未易人亦未易知漢光武將寵龐萌可以  
託孤卒爲戎首魏明帝期司馬懿以安國竟肆姦回夫小  
家治生有千百之資將以託人尚憂失授況兼天下之重  
而可輕忽委任者乎今昭德作福專威橫絕朝野愛憎與  
奪僂若無人陛下恩遇至深蔽過甚厚臣聞蟻穴壞堤針  
芒寫氣涓涓不絕必成江河履霜堅冰須防其漸權重一  
去收之極難臣又聞輕議近臣犯顏深諫明君聖主亦有  
不容臣熟知今日言之於前明日伏誅於後但使國安身

死臣實不悔陛下深覽臣言爲萬姓自愛

李承嗣

承嗣隴西人

造像記

維大周長安三年九月十五日隴西李承嗣爲尊親造阿彌陀像一鋪鐫鏤莊嚴即日成就威嚴相好燦然圓滿所願資益慈顏永超塵網銘曰

有善男子投心正覺是仰是瞻爰雕爰斲金容寶相雲蔚霞駁一契三明長銷五濁

李師旦

師旦新豐人官會稽尉

對京令問喘牛判

京縣宰冬日退朝逢相害者至死初不屑懷委而不問俄見行牛喘停車尋詰久而方去所司以爲不理所職妄干他事

二京分邑墨綬居官三揖通班黃圖作宰自可遠聞善政廣樹嘉猷江陵叩頭止風有驗洛陽強項據地無從可得道乏良規人餘惡少翳桑墻下不見童子懷仁垂楊路傍

唯聞暴客相殺一朝之忿爰揮白刃百年之命遽掩黃泉  
縣宰既不開口死者固難瞑目人雖進路事屬退朝忽此  
逢牛翻能駐馬羣非向楚詎是因風氣似還吳猶疑見月  
但以時流冬景寒結層冰自有慘切之容元無溫燠之候  
六畜行觀致喘四時坐見失宜此乃丞相及言何煩邑宰  
垂詰操刀之術罕明代斷之咄難免憂喘不憂殺正是越  
司問牛不問人豈非離局以爲妄干他事實亦雅叶本條

康瑾

瑾武后時擢書判拔萃科

對嗣足不良判

景食一縣嗣子足不良請立其弟禮司不許云

古有其道

大夫稱家榮高食采冢子當室業茂本枝盈大足徵期克  
昌於魏國六三能履或取笑於齊堂弱足者居奉身而退  
遵康叔之命以崇次及察韓黯之衷雅符高讓則先茅舊  
土今也載傳孤竹遺風此焉無替法聽棄疾禮貴象賢立  
弟捨兄理復何惑

吳師道

師道垂拱元年進士開元時官司勛倉部員外郎戶部郎中

對賢良方正策第一道

問欲使吏潔冰霜俗忘貪鄙家給人足禮備樂和庠序交興農桑競勸善師期於不陣上將先於伐謀未待干戈遽清金庭之祲無勞轉運長銷玉塞之塵利國安邊佇聞良算明言政要朕將親覽

對臣聞棲培塿者不覩嵩泰之干雲遊寧濶者詎識滄溟之沃日臣蒿萊弱質衡泌鰥生未識廣廈之居安知太牢

之味不量叢爾輕縱褒然謬達天聰兢惶聖問粵惟皇家  
出震累葉重輝天人歸七百之期宗祊聯億兆之慶太宗  
以明一察道括珠囊而總萬方高宗以通三御宸轉金鏡  
而清九服用能肅清天步夷坦帝途垂莫大之鴻基託非  
常之元聖伏惟皇太后陛下道超鍊石化軼捫天被子育  
之深仁宏母儀之博愛星階已正尚雖休而勿休宸極旣  
安猶損之而又損方欲還淳返朴振三古之積風緝政蒼  
生降四海之昌運拔幽滯舉賢良黜讒邪進忠讜故得鴻  
稽接軫和宇宙之陰陽龍武分曹節風雨之春夏禮樂備



舉學校如林俗知廉讓之風人悅農桑之勸猶復旁求輿  
議虛佇芻蕘旣屬對敷敢陳庸瞽誠願察洗幘布衣之士  
任以台衡擢委金讓玉之夫居其令守則俗忘貪鄙吏潔  
冰霜矣旌好學之流賞力田之伍則家罕貧惰位列文儒  
矣降通親之使喻彼梟心發和戎之官收其雞肋則四夷  
左衽顛倒來王三邊元惡謳謠仰化矣自然籠羲駕昊六  
五帝而四三皇遠肅邇安飛英聲而騰茂實謹對

## 第二道

問朕聞運海搏扶必藉垂天之羽乘流擊汰必佇飛雲之

櫟是知席蘿黃屋握鏡紫微誠資獻替之功必待弼諧之  
助所以軒轅撫運遂感大風之祥伊帝乘時遽致秋雲之  
兆朕雖慙古烈而情切上皇未校滋泉之占猶虛傳野之  
夢欲使歲星入仕風伯來朝河薦蕭張之名山降甫申之  
佐垂衣佇化端拱仰成多士溢於周朝得人過於漢日行  
何政道可以至斯思聞進善之言以副求賢之旨

對臣聞立極膺乾之君當宁御坤之主欲臻至道將隆景  
化莫不旁求俊彥廣命英奇凝庶績以安人綏萬邦而撫  
俗是故軒邱膺籙委四監以垂衣丹陵握圖舉八元而光

宅於是齊桓擬之於飛翼殷武興之以羹梅克贊人謀實  
宣神化陛下功包邃古道逸上皇授受惟明謀謨克序弼  
輔之任惣風力於前驅燮理之司列伊周於後乘振鷺翔  
鸞之客畢湊天階乘箕降昴之英咸趨日路猶且虚心卜  
兆託想旁求冀山谷之無遺庶賢良之畢萃俯訪愚魯敢  
述明敷誠願發德音下明詔咨列嶽訪羣公舉爾所知不  
遺於側陋知人不易無輕於慎擇下僚必錄上賞頻霑則  
葉縣遊龍自九天而下降燕郊駿馬赴千金而遙集漢未  
爲得周豈能多盡善盡美於斯爲盛謹對

第三道

問朕聞明王闡化感人心之靈聖后宣風移動植之性遂  
使翔龍薦檢鳴鳳司晨獸解觸邪草能指佞仰惟前烈何  
德而臻此乎朕逖聽遂初載欽神化每欲反斯煢薄景彼  
上皇欲使瑞楚司庖僊冀候月遊四靈於翠苑集五老於  
榮河致此休徵良由政感佇聞啟沃以副虛襟

對臣聞化浹乾樞景緯呈其靈貺澤周坤絡卉木效其禎  
祥是以若霧非煙必應文明之后九莖三秀允符光宅之  
君陛下應期納籙撫運登皇孝道格於元穹仁心光於紫

極自臨萬域輯御羣方靈瑞屢臻休徵薦至五蹄仁獸樂  
君囿而來遊六象威禽拂帝梧而萃止豈直銀黃玉紫雉  
白鳥丹翻鄙上之二稭拔江間之三脊固亦巡河受檢拜  
洛披圖降五老於星躔歸四神於雲路盛矣美矣巍乎煥  
乎躡三五以騰微吞八九而高視尚且崇謙讓之道守沖  
撫之德抑斯天瑞訪此人謀陛下雖不宰其成功微臣亦  
不知其所謂謹對

#### 第四道

問朕聞三微遞代哲后所以承天五運因循明王由之革

命或金水而鱗次應火木以環周或寅子變正天人之統  
斯辨驪駟改色昏旦之用有殊茲乃渙汗圖書昭彰歷數  
受位出震以迄於今莫不母子相承終始交際然而都君  
土德翻乃尚青天乙水行寧宜用白深明要旨其義何從  
若以秦氏霸基便有符於紫色則魏人鼎足豈復應於黃  
星緬鏡前修又以矛盾張蒼之議旣頗反於公孫賈傳之  
談復遠乖於劉向子大夫學包羣玉文擅鏘金旣聽南史  
之篇方佇東堂之問詳敷事實靡得浮詞商榷前儒誰爲  
折衷

對臣聞方圓旣闕帝王斯建四遊將六氣交馳五德與三  
微遞變自攝提著紀出震登皇循木火而相承用驪駟而  
繼作雖復武功文德揖讓干戈御旒扈以高居握圖籙而  
深視莫不垂天人之統順寅子之正始終之際何莫由斯  
暨乎運偶都君時云土德道鍾天乙數叶水行子勝母而  
尚青母生金而尚白略言其美斯窮奧旨至若秦居閏位  
紫實非正之符魏得中區黃標應星之紀未有矛盾允愜  
隨時漢祖承天人多異議張蒼言水而黑時方興公孫據  
土而黃龍復應代二劉之父子推五運之相沿較彼前談

斯爲折衷臣學非博古識昧知新輕陳管穴之窺猥奉天  
人之問慚惶靡地悚越兼深謹對

第五道

問朕以紫極暇景青史散懷眇尋開闢之源遐覽帝王之  
道或記載遙邈無其處而有其名或墳籍喪亡有其號而  
無其事將求故實以佇多聞至如化被柱州創基刑馬兩  
代之事誰遠五德之運何承石樓之都見匪均霜之地窮  
桑之壤元非測景之區時將域彼偏方惟一隅而獨王輕  
茲中土棄九洛而不營大夏之時化臻禁甲隆周之日道



致韜戈而七十一征翻在風皇之運五十二戰更屬雲官  
之期斯則偃伯之人無聞於太古推鋒之弊反息於中葉  
澆淳之道名實何乖欲令歷選前聖遠稽上德採文質之  
令猷求損益之折衷何君可以爲師範何代可以取規繩  
遲爾昌言以沃虛想

對臣聞一剖爲三始鴻濛於太易九變於七漸茫昧於無  
爲旣分清濁之儀乃列君臣之位則有天皇首出瞰柱州  
而宅土地皇革命俯刑馬以開都年匪異於萬八千號稍  
殊於七十二旣云木德亦曰火行開於天地之初錄自帝

皇之紀至若石樓遠界窮桑延壤非萬邦之土中爲二代  
之天邑斯乃時猶殷飲道上鶉居誰知風雨之均能建皇  
王之宅亦分長於九域豈獨王於偏方乃觀象垂衣化穆  
羲軒之代翦商伐扈人澆周夏之年而皇德方隆未弭戰  
爭之患王道纔著復存韜偃之日是則懷柔伐叛取亂侮  
亡雖鍾大道之行終佇勝殘之戰是政劣於太古非事優  
於中代陛下選芳列辟垂範千年王化旣平能事斯畢亦  
何必損益今辰之政師謨往聖之規撫和琴而促柱御夷  
途而止轍因循勿失臣謂其宜謹對

司馬鎰

鎰洛州溫人神龍中官黃門侍郎卒

對紫芝白兔判

懷州申衛士楊建德被差鎮勅到之後母亡遂  
廬墓側哀毀乃有紫芝生白兔來馴州司請加  
旌表廉察以爲避鎮科罪

橫戈出塞雖五校之嚴規主奠臨喪亦十倫之重制建德  
身參戎旅名列材官負羽晉韃將馳邊戍枯魚銜索旋迫  
私庭瞻大樹於轅門痛風枝之不靜聽嘶驂於戎幕感隙

欽定全唐文

卷二百六十

古月金 赤玉

三

駟之難留燕雀之心已纏於罔極熊羆之效未遑於載馳  
詳甲乙之科無虧典禁推忠孝之道何爽公私旣而匍匐  
墳埏充窮隴隧霜露之思義貫天經精感之微遂彰靈應  
白兔呈貺背三窟而來馴紫芝符祥對九莖而擢秀州司  
請加褒異錫類之儀載光使局作此科繩昧禮之情何甚  
聖朝孝理史官自合發揮建德至誠門閭固宜旌表

郝連梵

連梵武后朝對策擢第

對刑獄用捨策

問元默垂拱理歸上德法令滋彰事鍾澆季是以唐虞盡象四罪而咸服姬夏訓刑三千而愈擾故知勝殘去殺必在於宏仁反樸還淳不務於多辟方將削茲三尺專循五禮幸陳用捨之宜以適當時之要

對法星垂象列九霄而照燭習坎分爻疏六位而輝煥故有皇王慎罰正俗以經時聖哲詳刑開物而成務莫不克清函夏載穆黎元制天討之威嚴宏秋官之典憲舜遊媯汭乃去四兇湯出鑣宮諒除三面然則質文異代興廢殊途微禹會昌仁流於下泣獨夫受戮禍招於剖心自運往

道消淳離朴散王風不兢兢柳之刺斯聞后德方衰杞槐  
之制斯闕望夷招敗酷甚凝脂函谷生災冤多精氣雖復  
蕭何改創爰始九章溫舒上言仍譏一失網漏吞舟之罪  
士苟持寬律加盈閣之繁吏還舞智邈乎遺法允屬升平  
大唐執紀先天凝圖王氣化軼胥庭之上功超步驟之前  
掃氛祲於乾樞靜囂塵於地軸紫微君聖時乘光於得一  
黔首安生日用陶其吹萬皇帝上元統厯下武嗣徽道叶  
順風契黃神之罔象精通就日符赤運之文明於是職列  
英奇朝班俊乂載升降之節旣著禮容臨甲乙之科方在

政辟道無爲以端拱思有罪而責躬念向隅之獨嘖乃納  
隍而軫慮曲詢管庫取薦芻蕘誠宜妙簡平反旁求庶獄  
渭橋驚馬必歸張季之言禁圍射兔勿爽高柔之旨於公  
陰德委以廷尉之司盛吉深仁授以憲曹之任剖符寄劉  
寬之輩蒲鞭之教可追分陝趨召奭之儔棠陰之聽斯在  
加以五詞咸備兩造兼持運靜躁於韋弦聽遲速於寬猛  
獬豸雖觸咎繇行其惠化蒼鷹輟號郅都息於煩苛自然  
囹圄空虛靡怨黃沙之罪鉗鋏安用無施白粲之刑則迹  
邁成康道逾文景不仁自遠無得而稱謹對

張不耀

不耀文成子武后時上表請代父死

請代父死表

臣某言臣聞哀哀父母生我劬勞欲報之德昊天罔極臣父文成充使不了特寘嚴刑罪小責深不勝冤苦街衢驚歎長幼咸嗟皇天后土實所鑒照臣聞有理不伸枉填溝壑臣子情切骨肉恩深請以微軀代父當死乞寬父之殘命展愚臣之孝心伏乞天命俯垂矜察不耀萬死猶荷再生臣父朝無近親孤宦獨立苗疎難植根淺易危無風而



自倒不寒而自戰李全交挾邪作蠱舞法弄權虐甚周興  
酷殊來俊枉陷良善以立己功惡貫已盈貪殘事敗不慙  
顏厚猶事糾繩不懼皇天仍居憲府罪輕責重其枉實深  
但恨明時虛編咎悔伏願陛下採輿人之誦聽左右之言  
乞不濫無辜庶冤魂重返即臣雖死之日猶生之年不任  
酷裂之至冒死投匭以聞

欽定全唐文卷二百六十一目錄

新文藝出版社藏書

李邕一

石賦

鵲賦

春賦

日賦

鬪鴨賦

賀章仇兼瓊克捷表

賀加天寶尊號表

賀新殿鐘鳴表

賀感夢聖祖表

辭官歸滑州表

爲濠州刺史王弼謝上表

淄州刺史謝上表

謝入朝表

謝元宗書上考表

謝勅書及綵綾表

第二表

謝賜遊曲江宴表

謝恩慰諭表

進喜雪詩表

進文馬表

諫鄭普思以方技得幸表

謝恩命遣高將軍出餞狀

又駁韋巨源諡議

欽定全唐文卷二百六十一

李邕一

邕字泰和祕書郎善子長安初拜左拾遺唐隆元年拜殿中侍御史改員外郎郎中屢貶幾中法死以軍功累轉括淄滑三州刺史天寶初爲汲郡北海太守旋爲吉溫羅織勅使就郡決殺之時年七十餘後因恩例得贈祕書監

石賦

代有遠遊子植杖大野周目層巖覩巨石而嘆曰茲盤礴也可用武而轉乎茲峭峙也可騰趨而登乎觀其凌雲插

峯隱霄橫嶂峻削標表汗漫儀狀劃鎮地以周博崛戴天  
而雄壯默元雲之暮起赭丹霞之朝上若使矗布長城疑  
聯高壁遏西戎而分塞截東胡而度磧張九州之地險威  
四夷之天隔固可以眇絕驕子遐阻勅敵歸華夏之甲士  
却邊荒之羽檄別有列在王庭地當文砌疑貞琬之粉澤  
豔重錦之光麗承聽政之梁柱納進賢之階陛匪徒夾植  
桃李因芳蒨蕙降神女之徜徉拂仙衣之容曳若乃苔蘚  
剝落雨露淋漓冰碧藻曜繪畫紛披不邀代之所貴不欲  
人之見知罔懷金而則異曷剖玉而方奇至若危堞孤援

懸門禦衝出陣摧鶴乘城起龍礮與矢而飛兩磁當途而  
列墉金鼓爲之沮氣戈矛爲之輟鋒借如奕秋沈思蜀相  
興圖秉節制以全勝縱劫殺以論都鄙宋緘之謬識嘉禹  
鑿之神模落五星而多幃坐千人而不孤惟磨礱之所取  
任圓方之自殊支空畱於織室編尚想於兵符鳥何恨而  
填海山何言而望夫徒以貞者不黷堅者可久卧如羊於  
山野蹲似武於林藪知作鼓之希聲信爲人之無偶梁架  
海以東注鎮臨江而南守庶投水而克成將補天而何有  
豈獨砥礪利器盤踞眞王鏃來肅慎門通越裳屹特立以

興主駕能言以發祥邇開蓮兮表華遠倚劒兮疏梁保茲  
城而永固結彼交而不忘何止藏書入室勒篆離經翕湘  
川之飛燕伏昆池之駭鯨膏久服而顏駐碑一觀而涕零  
豈如扣角匡坐且悲歌於白水尋山小住止危途於翠屏  
而已哉

鵲賦

伊鷖鳥之雄毅有俊體之超特意凝緩而無營體閒整而  
自得陰沈其情慘淡其色固未足以異於眾禽也夫一指  
一呼一擊一搏爲主之用騁人之樂凜然神動翕然氣作



殞三窟之狡兔斃五里之仙鶴勝霄漢而風捲透原野而  
星落萬乘爲之顧眄六軍爲之揮霍歡聲動於天地逸氣  
靄於林薄至若逐鳥舛類射隼殊名獲不相讓遊不同征  
何至德而能制每協義而不爭偶坐推食雙飛和鳴殺敵  
齊力登樓比形夫其嚴冬沍寒烈風迅激或上棘林或依  
危壁身既稟於喬木骨將斷於貞石營全鳩以自暖罔害  
命以招益信終夜而懷仁仍詰旦而見釋矧乃戀主不去  
徇食猶止豈貪利而永言將效誠而必死甘閉於籠分從  
於使寧竭力之利人曷戢翼以存已則知負力干勢爭啄

奪肉始飛聲而遠引或側翅而橫蹙遇之者天當之者覆  
壯士感之驚歎行子羨之迴矚故能連擊縱便臨事莫違  
一超雲以高舉一隨物以低飛驅逐妙於人智促節合於  
兵機禽雖小而不陋獸雖捷而無依或則九霄擊下萬里  
接來風行電轉月上雲開乍差池而不中終棄置而不迴  
彼俊異之英決豈凝滯於嫌猜觀夫愛子防嚴惜巢忌物  
吻戛戛而雄厲翅翩翩而勁逸背距者先中而命處懸蠻  
者異狀而同疾苟精別而棲條同賞心而無失

春賦

肇木德以周仁啟春生而賦質二儀泰而廣運三正合而  
元吉和氣霽兮充寓光風瀏兮被物豈因時而則舒亦樂  
道而奚恤我聖君大撫萬國肆覲羣后受天之禧嘉歲之  
首文物粲於南宮兵戈森於北斗攬百辟以同心貢千春  
之遐壽於是明詔有司攄求時令邁惟一之德究吹萬之  
性勦土木之庶功阜稼穡之勤政畋漁止殺狴牢復命至  
若固陰往閉蟄戶未開虵盤地蓄燕伏巖猜穴蟻斂翼冰  
魚鼓鰓蠢蠢宛委戢戢低徊遲擊蒙兮久矣耿獻歲兮悠  
哉謂將死而沒代俄作解而驚雷廓視聽於元壤脫飛騫

於焚萊瞰青陽以書物事白日而登臺觀乎旬時甫田宿  
昔曾薄驚洪濤之神用偉元化之工作卷山河之變衰置  
天地之和樂律何谷而不暄光何容而不灼植也知歸動  
焉咸若爾乃楊迴曲沼李雜芳園條煙濃而曳地花錦繡  
而當軒玉顏景照羅袂風翻惋良人之謬信省賤妾而銜  
恩蝶栩栩兮夢感鳥嚶嚶兮思存戛瑤柱以絙瑟引金竿  
而浮樽俯侯軒而下泣貽韶物而何言借如老軍追虜遠  
使窮河宵驅鳥逝野次星羅冰皚皚而雪下風颯颯而霜  
過遲日一煦挾纈嘗多遣疇歲之寒栗襲初節之妍和千

巖爲之動色萬壑爲之流波將迴轡而秦望請舉手而幽  
歌則有第高公族鼎貴侯家丹樓纏於御道畫閣聳於朝  
霞明珠買妾黃金擲黿列行遊行直視驕奢誇浮雲之寶  
騎頓流水之香車漫平郊而藉草總上苑而觀花飛鞭蹴  
鞠旋舞琵琶麾戚里之途遠駐長安之日斜豈知夫東門  
在野北渭需沙散歸閒之邵父隱養正之姜牙趣下里之  
潦倒誼樂士之繁華苟炙背而垂釣但開田而種瓜

日賦

惟元氣之播儀式景曜之騰烈倚崇蓋而西轉駿流光之

東晰豈盈縮兮彌歲亦畏愛兮異節曠淑色而布飢赫炎  
氛而生熱所謂純精至高至明燭龍照灼以首事跋烏奮  
迅而演成開天地之司目爲帝王之我兄文思以之寅饒  
神武以之揭行是以節朝有政逮是未餐揚暉而四方動  
色霽景而萬物聳觀豁雲霧之凝暗解雪霜之沍寒願揮  
戈兮再晝俟傾藿兮長安至若瑞氣浮烟休徵抱戴乍出  
海而融朗忽飛天而光大千里發乎主明五色見於時泰  
將閉谷兮永言豈覆盆兮貽悔則有懷人惆悵酌醴獻酬  
冥一醉兮千日渴一日兮三秋昔定鼎兮卜洛彼昇天兮

上遊處立觀於溟渤遂測景於嵩邱借如夸父棄策奔走  
何益夫子重陰道業所欽歎遲遲之春日阻悠悠之宿心  
惜落照於崇木重遙思於竹林粵若飛箭易及長繩難駐  
知息影之未寧喜傾蓋之相遇始曝書兮多暇復炙背兮  
成趣見蘭蕙之有暉想桃李之可樹別有誓以期皦至以  
憂長旣中時而必簒亦後甲而見陽與聖人兮齊朗宜君  
子兮借光卜在地而占吉說通夢而尋昌匪直燭之滅私  
行之惟則若御車之有輪豈搏空之無翼固幹運兮誰使  
諒周行而不息重光起於一人合璧旋於八極觀乎翠萍

生實赤羽從軍儻一編之欲授曷三餘之敢聞夕沒銜於  
黛巘朝隰夾於火雲何白駒之激急致華髮之繽紛若乃  
江湖積氣霧雨經時莓苔連於枕石泥濘汨於川坻仰蒼  
蒼而不見俟杲杲而常欺將遣慰兮安適每沈冥兮自悲  
借如謫居海上喟息天間有哀猿兮斷續無飛鳥兮往還  
事填膺於瘴癘情滿目於雲山未回光於東闕猶屈指於  
南蠻乃舉手而歌曰披雲覩日兮目則明就日瞻雲兮心  
若驚日爾一日兮何道時哉幾時兮此生

鬪鴨賦



東吳王孫嘯傲閭門魚橫玉劒蟻沸金樽賓僚霧進遊俠  
星奔桂舟兮錦纜碧澗兮花源爾乃輟輕棹登水閣絲管  
遞進獻酬交錯雲欲起而中畱塵將飛而遂落旣而酣歌  
徙坐取物爲娛徵羽毛之好鳥得渤澥之仙鳧出籠而振  
少步而趨唼喋爭食襍褻帶雛隨綠波而澹淡向紅藻而  
敖愉鳧之爲物也說類殊種遷延遲重其聚則同而不和  
其鬪則仁而有勇參差輦聒颯沓續紛其浮蔽水其旋如  
雲共沿波而弄吭各求匹而爲羣繞菰蒲而相逐隔洲渚  
而相聞於是乎會合紛泊崩奔鼓作集如異國之同盟散

若諸侯之背約迭爲擒縱更爲觸搏或離披以折衝或奮  
振以前却始勦力兮決勝終追飛兮襲弱聳謂驚鴻迴疑  
返鵲逼仄兮掣曳聯翩兮踴躍忽驚迸以差池倏浮沈而  
閃爍號噪兮沸亂傾耳爲之無聞超騰兮往來澄潭爲之  
潰濩排錦石蹴瓊沙披羽翰簸煙霞避參差之荇菜隨菡  
萏之荷花駐江妃之往棹畱海客之歸槎爾乃擁津塞浦  
旁觀如堵空里鄺旬厲天蛙黽兮失穴龜魚兮透泉專場  
之雞沮氣傾市之鶴慙妍其爲狀也不一其爲態也且干  
豈筆精之所擬非意匠之能傳良戒之於在關俾聞義而

忘筌

賀章仇兼瓊克捷表

臣邕等言伏見中書門下章仇兼瓊奏稱吐蕃數萬圍逼於城皆遵奉九重決勝萬里臣聞雷之震者可以破山風之威者可以蕩海伏惟陛下允答天地不應鬼神吸之而百川却流吹之而萬物倒植是以斲勞貔武一掃戎羌高屋用於建瓴銛戈申於破竹豈云懷縣獨有獲嘉何止絳城復稱聞喜光風動處草樹爲之欣榮晴天轉時日月爲之融朗況臣等分官寄切報國身輕蹈舞徘徊恐門庭之

地窄詠歌踴躍賀邦家之慶深無任欣悅豁快之至謹詣  
朝堂奉表陳賀以聞

賀加天寶尊號表

臣邕言伏奉今日日恩制萬方士庶九土軍戎昭洗宸波  
光被聖渥臣誠歡誠喜載欣載躍頓首頓首死罪死罪臣  
聞沐雨露者草樹自樂荷陶鈞者動植皆春故知則而象  
之守而行之所謂則天之明立人之極有慶斯大無得而  
名者也伏惟陛下尊崇聖祖肅恭道教子物天德序位代  
工惣三五之妙勲統億兆之全業戈甲謐息華戎底平故

得真容慶應潛通帝夢寶符靈貺允叶神心加號所以發  
祥郊天所以昭報大禮盛事光赫旬時作解周仁廓開宇  
宙天京褒稱雲紀變名風物光華再馳暉於日月河山保  
界重賦質於乾坤同一氣之建初與四時而浸遠天長地  
久呼萬歲於太平國泰朝歡舞九韶於聖主臣忝私守郡  
常荷戴天空馳就日之誠未盡歌雲之慶無任欣躍竦抃  
之至

賀新殿鐘鳴表

臣邕等言伏見昨宣示於新殿爲萬姓祈禱神鐘自鳴是

知聖作昇聞天意下降道開皇極潤及生人臣等中賀臣  
聞光覆動植者莫如天臨照幽遐者莫如日自非齊聖妙  
用曷以則而象之元化至德曷以感而通之伏惟陛下道  
心沖叶神教昭宣以四海爲家萬人爲子常恐水旱遞有  
干戈斃勞所以供祀百神用祈五福德澤被物聖靈動天  
睿情注於一時景鐘鳴於別殿夫衆者萬有也廣者四維  
也今陛下惣萬有一四維潛運方寸之間充塞宇宙之外  
則何聖不鑒何神不昭豈惟一鐘乎況南面之位屈陛下  
之至尊西方之金啟陛下之本命非無情之應是有由而

來自然羣龍扶持九天欣戴保億兆之元后登千萬之永  
年時觀雍熙代階仁壽此天所以告鐘所以鳴臣等幸朝  
上京欣遭大慶一舞一蹈未極臣子之心再詠再歌徒知  
天地之德無任抃躍之至

賀感夢聖祖表

臣邕言伏奉今日制書至德感神通夢聖祖告以莫大  
之福示以無疆之期上賀國歡下敷人願以抃以躍且舞  
且歌臣某中賀臣聞百川所歸者謂之大海萬有所仰者  
謂之聖人今四海獲安聖人致壽臣子之願允塞乾坤之

應克諧粵自書籍以來感慶之深福祐之盛未有如斯者也伏惟陛下道用御天德心子物事無事以集休明至明以元悟人天乃接福貺爰臻故得真仙見靈異相昭應言皆合天心證非外將恢宏聖慮照自宸衷啟之大年授以元祐麻姑觀海歷歲彌長王母記桃與時無準則幽明所載宗廟所鍾兆庶子孫百靈齊集知億年之永託沐萬代之延休草樹自榮魚鼈咸若五風異色四氣同和鼓天地之大鑪鑄邦家之鴻業八極猶小不足受其禎符萬物每輕不足答其成造況卹獄宥死符以再生寵賢達人宴以



旬日者艾衢陌工賈旗亭高興太平之時歡言上古之化  
撫家族以自慰詣州邑以相誇官不驕人人不畏吏識天  
之覆熙然如春惟聖之慈陶然如醉無任抃躍慶喜之極  
謹附表陳賀以聞臣邕誠歡誠喜頓首頓首

辭官歸滑州表

臣邕言臣素無藝能積負訕謗衆多之口自可銷金怨讎  
之心每堪殞首伏惟陛下至明大聖察之纖微盛德在人  
洗之瑕穢山川納者不擇薰蕕天地覆之是霑雨露且人  
荷惠渥大抵官榮今臣蒙國恩私及軀命事出涯分之外

恩加父母之深已逝之魂復歸朽質旣乏安地尚忝高班  
雖欲殺身未能報主彌慙持祿有以保名但秋燕將辭必  
徘徊於大厦老馬雖去終顧步於華軒況臣今茲六十有  
七光陰荏苒行止歆危就木之時不知幾日懸車之歲僅  
有三年卽以今日歸州不任違遠涕戀之極謹奉表以聞  
爲濠州刺史王弼謝上表

臣某言伏奉某月日制除臣濠州刺史聖澤天臨寵章霞  
煥身微草芥施重邱山臣某中謝臣某奉詔字人星言卽  
路三省不及二過有懷棄短之恩竭力難負悔非之感慙

血未申以某月日到州上訖臣履冰誓心飲水銘骨勵精  
爲政刻意求仁實望昭發宿誠宣揚大化上酬天地之德  
下盡臣子之忠萬死足矣

淄州刺史謝上表

臣某言伏奉某月日恩制除臣淄州刺史以今日便道  
至任自遠江左近守河南收弊死灰建置生路別荷成造  
兼冀昇遷三慶集身百齡踰外中謝臣聞天地大德含育  
及於昆蟲雨露深仁霑霈及於蕭艾不限微品有愧洪鑪  
職臣之謂歟伏惟陛下道總三才在璿齊政運超四孟與

物爲春元造加於萬方聖慈周於一物子人開化議事立  
權張皇連城勸勉羣岳身同京職承祿賜之恩榮子預選  
曹廣門閭之惠澤是以龔黃蓄銳卓魯專精竭盡公忠宏  
宣績用但駑駘之力不足以騁長衢朽木之資不足以施  
長桶徒遷厚祿無益聖朝撫事捫躬慙魂跼影伏以東臨  
巨壑借渤海之水寬西望京師就長安之日近

謝入朝表

臣邕言伏奉七月十五日恩勅許臣會計京師者止水一  
盃忽聞朝海枯查八月更得浮天臣某中謝臣以幽遐必

察者日月之照明憔悴皆霑者雨露之恩廣伏惟陛下天  
德陰騭神功獨斷咸造吹萬容至於工養報通三大及於  
小豈臣微物得預洪鑪在昔全生已承曲記斯今上計再  
荷特恩戴盆之心仰天有望出籠之鳥飛空可期方將蹈  
舞闕庭慙戴咫尺葉公宿願一覩真龍岐下遺叱忻逢聖  
主無任喜躍慙荷之至

謝元宗書上考表

臣某言伏奉今日日聖恩鑑以薄能光賜上考御詞激物  
睿獎動時戴天不勝跼地無所臣某中謝臣聞荷再造者

遍於有情勸庶工者盡於有位莫不宣其力竭乃誠欣赴  
前儔恥居後殿者蓋以萬數則區區揚化眇眇納忠自比  
彭蠡之魚更是海濱之鴈伏惟陛下大和布氣巨壑流津  
宇宙開明既昭纖草山河鮮潤每納昆蟲豈臣凋枯復霑  
雨露天漢之上遙記嚴平宣室之中興言賈誼摧羽插翼  
忽飛翥於雲霄暴鰓捷鰭重游泳於溟渤豈有循吏得預  
詞林鯁鼠軒墀鷄鵠鐘鼓徒驚獎飾益用慙惶況乎政術  
空虛褒述累積文高日月辰象法之不逮德厚嵩華羣岳  
朝之莫階雖郭隗濫觴明主有所蓄意然邵信敦本微臣

不敢負人慶抃則深憂懼亦切無所報國空以誓心不任感荷欣惕之至

謝勅書及綵綾表

臣邕言內使左立真至伏奉去年五月二十日御札慰問並賜綵綾章服跪捧天書勢在龍武仰瞻禮物色映虹霓慙戴汗流戰懼心慄臣某中謝臣聞食曰人天實生生之厚道稱物母得存存之多伏惟陛下載以坤輿覆以乾宇排衆口之謗開獨見之明生臣存臣至於數四寵及問及彌於再三豈魯陽宵人杲日迴照荆樹散木慶雲結陰臣

是以坐有所思行冀所得求西山之藥願補聖躬論東戶  
之人以分帝念識愚不足以廣聽事蹟不足以動忠夫何  
望焉非所隱也豈謂塵壤見納推言不遺獎以及誠許以  
佳士澤深巨海德重崇邱曷云家奉賜書光華九族物延  
恩舊褻寵百齡淥水之龜且能迴首黃華之鳥將以誓心  
惟報主之末由恐殺身之無益不任載荷欣躍之極謹因  
內使左立真附表云云

## 第二表

臣某言伏奉去年月日御札特賜臣章服綵綾等八體神



變迴龍鳳之殊姿五色暈開動雲霞之仙氣臣誠歡誠喜  
頓首頓首臣聞礎之潤也是足興雲戈之鋒也或能照水  
雖言微物有以上通常未察焉今可明矣伏惟陛下一武  
一文廓彌綸之道乃神乃聖疏造化之元盛業極天鴻休  
紹古子育庶物臣伏百蠻溟渤不波沙朔無障太平之律  
大聖之功不得已而用之猶且增高彌短廣大衆流錄賢  
傾寓內之心捨過求天下之俊所以喁喁者將百身以效  
節區區者願一報以瀝肝況臣拔自九原出於萬死再收  
駭骨更造衣冠舌在不足以歌堯命存未能以報國豈謂

上仁德廣澤利無益之臣博愛理深慈育不才之子天門  
下詔橫筆陣於長山御府賜衣列錦川於淄水臣道子道  
何顏受之今恩昔恩曷云報者戴天知重望日懷慙無任  
悚惕震惶感戴抃躍之極謹昧死遞表陳謝以聞

謝賜遊曲江宴表

臣邕等言臣聞昔時人君之德也大撫萬國必親諸侯是  
以通下情序賓禮伏惟陛下因遇上已收接下臣順發生  
之時宏在鎬之宴仙廚和鼎浹洽於廣筵舜瑟歌風均調  
於曲水土女車騎充溢山川林薄光華纒連城闕臣等撫

躬何幸報德無階空慙尸素之名豈適輪轅之用不任戴  
荷抃躍之至謹詣朝堂奉表以聞

謝恩慰諭表

臣某言伏奉今年某月日恩旨恕臣重責護臣小才月日  
之明早曜絲髮雷雨之施振起昆蟲臣某中謝臣二十餘  
年數從遠謫流離辛苦契濶死生因陛下興聖謀行天討  
救萬人之命解四海之懸臣所以脫於往危保於今泰者  
爲此頃歲昌宗執柄三思弄權臣與宋璟同論桓敬俱奏  
貶臣爲富一作常州司戶實荷陛下誅韋氏之後收正人之

餘特拜臣左臺侍御史此陛下活臣之命貸臣之榮一也

頃歲譙王重福謀立東都臣當畱臺與洛州司戶一作馬崔

日知挫其逆形收其餘孽東都底定職臣之功自文林郎

拜朝散大夫除戶部員外郎岑曦崔湜之輩以臣再用往

還并忌崔隱甫倪若水等恐爲陛下之助與臣同制各貶

官仍聯翩左遷爲崖州舍城縣丞及陛下正位紫宸臣又

自嶺南九品遠惡官除朝散大夫戶部郎中又荷陛下活

臣之命貸臣之榮二也頃歲陛下東封將還臣路左謁見

猥承聖顧廣錄舊文朝議恐陛下用臣薛自勤與外生庫

狄履溫羅織臣至死仍承陛下免其罪授臣官又荷陛下  
活臣之命貸臣之榮三也臣出入嶺南自經一紀自澧州  
司馬加朝散大夫兼此州牧解青綬垂彤襜去瘴毒之艱  
遂江山之性又荷陛下活臣之命貸臣之榮四也且臣遠  
覽前書頗聞故事一飡之惠尚可殺身況臣蒙聖主千年  
之恩救愚臣萬死之急至若訓誨委積率論再三蚊力負  
山不勝其重螢火向日徒失其晶必當閉戶絕交澄心去  
欲下以安所部上以報所天豈徒殞軀喪元焚妻夷族而  
已無任生死肉骨恐懼感戴之至

進喜雪詩表

臣邕言一昨瑞雪愆期農人阻望陛下以億兆勤慮倉廩  
貽憂禋祀元冥祈禱黑帝固能至誠應物聖德動天朔雪  
下於龍山海神朝於鳳闕是以途歌邑舞野慶朝歡荷一  
人之渥恩爲四海之膏澤臣仰思揚化伏念輔時雖力減  
鴻毛而情殷鶴立無任喜躍慶賀之至謹昧死詣金闕門  
陳表貢詩一章臣邕誠惶誠恐

進文馬表

臣某言臣聞禽獸殊祥卉木奇狀自古感者必有應焉伏

惟陛下德合天地道通神明天物所以來神物所以見且  
麟者仁獸主仁者則呈焉者文身君文者卽降曾是上叶  
尊號下報太平也觀夫豹蔚騰文龍章助聖書籍所未載  
耳目所未聞卽知非常之君必有非常之物臣不勝抃躍  
欣慶之至謹遣某官馳表奉進以聞臣某誠惶誠恐

諫鄭普思以方技得幸疏

蓋人有感一餐之惠殞七尺之身況臣爲陛下官受陛下  
祿而目有所見口不言之是負恩矣自陛下親政日近復  
在九重所以未聞在外羣下竊議道路籍籍皆云普思多

行詭惑妄說妖祥惟陛下不知尚見驅使此道若行必撓  
亂朝政臣至愚至賤不敢以胸臆對揚天威請以古事爲  
明證孔子云詩三百一言以蔽之曰思無邪陛下今若以  
普思有奇術可致長生久視之道則爽鳩氏久應得之永  
有天下非陛下今日可得而求若以普思可致仙方則秦  
皇漢武久應得之永有天下亦非陛下今日可得而求若  
以普思可致佛法則漢明梁武久應得之永有天下亦非  
陛下今日可得而求若以普思可致鬼道則墨翟干寶各  
獻於至尊矣而二主得之永有天下亦非陛下今日可得



而求此皆事涉虛妄歷代無效臣愚不願陛下復行之於  
明時惟堯舜二帝自古稱聖臣觀所得故在人事敦睦九  
族平章百姓不聞以鬼神之道理天下伏願陛下察之則  
天下幸甚

謝恩命遣高將軍出餞狀

右高力士奉宣口勅以臣臨政特令賜宴恭承惠渥伏念  
庸微天地周仁木石知感不勝惶悚戴荷之極臣死罪死  
罪臣歷觀自古君臣凡所際會或因緣黨進或收接功成  
故未謁而知不言而信豈有地孤援寡毀衆謗深察蒙蔽

之中致昭曠之外逢陛下特達之遇當陛下明聖之朝事  
出常均恩重今昔臣誓將瀝血足可竭誠徒欲殺身豈能  
報德至如勵精勤政舉直徇公副陛下憂人之心行陛下  
宏道之化豈敢失墜以負神明但函關路懸長安日遠不  
任戀主悽悽之至

又駁韋巨源諡議

夫古之諡在乎勸沮將杜小人之業冀長君子之風故爲  
善者雖存不貴仕而沒有餘名此賢達所以砥節也爲惡  
者雖生有所幸死懷所懲此回邪所以易心也嗚呼巨源

嘗未斯察而乃聞義不從與惡相濟蓄罔上之志協羣兇  
之謀苟容聖朝貪昧厚祿自以宰臣之貴不崇朝而賈害  
者固鬼得而誅之也彼則匹夫之微未受命而行刑者固  
人得而誅之也幽明之憤斷焉可知天地之心自此而見  
矣頃者皇運中興功臣翼政時序未幾邪逆執權姦慝者  
拜爵於私門忠正者降黜於藩郡巨源此際用事方殷且  
於阿韋何親而結爲昆季於國家何力而累忝大官此則  
闇通中人附會武氏託城社之固亂皇家之基其罪一也  
又國之大事在祀與戎酌於禮經陳於郊祭將以對越天

欽定全唐文

卷二百六十一

李邕

三

地光揚祖宗旣告成功以觀海內惟昔亞獻不聞婦人阿  
韋蓄無君之忱懷自達之意潛圖帝位議啄皇孫昇壇擬  
儀拜賜明命將預家事無守國章巨源創跡於前悖逆演  
成於後時有禮部侍郎徐堅太常博士唐紹蔣欽緒彭景  
直並言之莫從其罪二也又上天不弔先帝遇毒悔禍無  
徵阿韋將篡畫計未果逆心尚搖周章夷猶倉卒迷謬於  
是太平公主矯爲陳謨上官昭容給草遺詔故得今上輔  
政阿韋參謀將大業垂成而休命中輟者職由巨源躡韋  
溫之足楚客附巨源之耳梟聲遽發狼顧相驚以阿韋臨

朝以韋溫當國其罪三也又人爲邦本財實聚人奪其財  
則人心自離無其人則國本何恃巨源屢踐台輔專行勾  
徵廢越條章崇尚侵刻樹怨天下剝害生靈兆庶流離戶  
口減耗況以三思食邑往在貝州時屬久陰災逢多雨租  
庸捐免申令昭明匪今獨然自古不易三思慮其封物巨  
源啟此異端以爲稼穡湮沈雖無菽粟蠶桑織紵可輸庸  
調致使河朔黎人海隅士女去其鄉井鬻其子孫飢寒切  
身朝夕奔命其罪四也但巨源長於華宗仕於累代作萬  
國之相處具瞻之地蔽日月之層輝負邱山之重責今乃

妄加褻述安能分謗者哉